



NUMLI VAX KAWN KHRIT COM RAWM

LAI SITANG

Pa Rieng Khri

BAPTIST MISSION COMPOUND, NAUNGPHA, KYAING TONG, UNION OF MYANMAR. No.39, MYAUNG MYA STREET, QUARTER (1), LASHIO, UNION OF MYANMAR. 084-22554
Nyum (1), Nambat (2) 082-22554
084-23490
2017, Khix (1)

Pawie Naog Numli (10) Num

Ka daux 2016 num, Numli Vax Kawn Khrit Com Rawm hoik pon ti rieb cau ka kaing jhaw Siyiex heue. Siyiex hoik kieh ex ceu pui vax tang cung ka caong tokaux tix mai tawx Numli Vax ka ex, hoik koe kao num phao heue. Mawh kheu nan, daux khix tix 29 ngaix hoik pon ti yuh pawie yaogyaw naog Numli Vax (10) num ka daux Lum (2) Numli Vax Veng Lashio heue.



Klang Krih

Ngaix Paoh Siviex Lawng Ceu Kaux Cawng Lai Sigang Khri Vax

Daux 2016, khix (7),(10) ngaix; yam yuh singaix Yudaxtan, daux Cawng Lai Sigang Khri Vax, Cawng Lai Sigang Khri Vax tom pon paoh ka siviex lawng ceu kaux Cawng heue.



Klang Krih

Krax Gau Grawng Son Mawh Kawn Cau Khrit



Ka daux khix Aliah, 26 ngaix tom hoek 29 ngaix, Numli Vax Kawn Khrit Com Rawm tom baox pon ti sitioe yuh krax gau tau mai DFC (Discipleship For Christ) grawng "Son Mawh Kawn Cau Khrit" ra bawg tix bawg daux lum (2) Numli Vax heue. Baux veng loe mu pa mawh baux veng Hopang, baux veng Lashio mai baux veng Tangyan tom pon ti viex daux krax gau an heue. **Klang Krih**

Lox Singeuh Taix

Ka daux krax moh Siyiex simie tix singeuh taix ka ex kukaux khawuik. Bawgyam pa mhawm, num pa khraox, kieh min plakngai Simiang Siyiex grum naog piang ex khawmuik liak. 2016 num, hoik luan hu khaing ex, mai Num Khraox 2017 num, hoik hoek son ex, in mawh buanson pa thong pa giex Siyiex piang krax im ju ex tete heue.

Awm an, Numli Vax hoik naog (11) num, awm kawn nyawm awn ju haok huan ting lhaong pa sang pon cung sijung son bawgyam pa sang hoek heue. Mawh kheu nan, simie tix singeuh taix ex ka grawng in loe ceu awm plak greem in heue.

Baux singaix in, mawh bawgyam haok huan ting lhaong daux krax daux blawng grawng pingnya plak kuceu heue. Kawn pui haktiex tag hawt krax haok huan haktiex mai chix piawm ka ju khuan tokaux tix heue. Tiblah hawt khaix mau khri daux krax pa ang khawcaw, tiblah simie ti koe min sivoex ngai kawn pui mai yuh ti pon daux pa ang rahsee heue. Bawg tiblah, gaux rhawm daux nex nham ang lai kaux sijax ka piang mex moeng tix heue. Inkix, ang tie mawh pa khraox pa nga ka son kawn pui hoik dawg mawh pa nyaw pa glaw ka ex kawn pui plak nex nham heue. Awm pa tawx cao Pawlux lox satix ka ceucao Galatix 5:17-21 ceu pa viex rhawm tix daux nex nham ang doh chix dex dawd mai meung roama heue.

Baux singaix in, ang joeng mawh ngie pui awn ju, pie pui riex ju kawx uik bawgyam tix mai pa gaux rhawm nex nham daux krax pa ang rahsee, dee sidah sumnai tokaux khuan ju heue. In mawh pa khirhawm ex son ceu pui ex mai son ceucao khawmuik heue. Awm ah daux lai Efesux 6:10 keih koe riang rao ka daux Simiang Siyiex, kadaux riang rao siawp sibrawm Nawh heue.

Ra baux ti baux, sonsang kaux cong ceucao pa koe daux Numli Vax, kaing ting num ka piang krax im ju kawn ceucao heue. Krax im ju kawn ceucao pa ah ex mawh pa yuh ka mawx? Krax yum-rhawm, krax pa ot daux Gumlox Siyiex, yuh kaing krub pa khaw rhawm Siyiex, sibieh rhawm ti tan daux pa khaw caw mai alo Siyiex, jhak pakngai Siyiex mai hawt alo Nawh Cao heue. Phan ceucao ang kaux cong, Numli mai kaing satsana ang doh chix kaux cong haok huan heue. Krax haok huan ting lhaong cao sidix khankix daux khuan, mawh riang rao mai sibrawm son ceucao khankix heue. Phan cao sidix pa yuh kaing jhaw Siyiex ang grum naog daux khuan, kawn yung khankix kawx, ang koe riang rao mai sibrawm plak ju plak khuan, phan yuh nan, krox ka paox tix, tix ceu hoik tix ceu, tix dah hoik tix dah heue. Khaix an, ceucao khankix lih ti mawh pa grai daux nex nham piang haktiex heue.

Pa ghoik loe mu ti mu, lox singeuh taix pa simie ti krai ka ex, baux singaix in, ang lai mawh bawgyam sawg pui ti koe riang rao plak mau khri nong nong, hoik mawh bawgyam silah pui paox tix ka pingnya cuyi heue. Pon tawx ex pingnya cuyi pa ting pa lhaong glhaw ka kawn praix tix, awm hoik pon yuh ex naing pa mhawm son ceucao, son ceu pui tix, son haktiex meung tix heue. Baux singaix in, pui kok mawh baux singaix bawgyam 'IT' baux singaix pingnya heue. Awm ah daux lai Lox Kab 1:7, rhawm pa lhat graung ka Siyiex mawh num riah pingnya heue. Ju tax ju yiex ex kix dix, kix een rhawm tix ka ma kaung, krak mawie, khawng eei brie liang, sinngao nex nham nong nong, baux ju bawgyam kawn praix kix kadaux tawm taix ex in singaix, dah khaix pui tom nie ang mawh lie? Plak cao kaing haktiex, mai plak kuceu kublawng ex rug kied dah khaix pui tete heue. Mawh kheu nan, ex caw tix sau riang kieh kawn praix tix khankix pon sawg ti cie pingnya cuyi plak kuceu sonsang mawh riang rao ka son ex bawgyam pa sang hoek heue. Kieh pa rieng Siyiex mai krax taoh Nawh Cao grum hoek ka piang ceu pui ex khawmuik liak.

Rev. Ai Nap Tao
Cao Bung Kaing Kuceu
Numli Vax Kawn Khrit Com Rawm

BAWDA KAWN DOE VAX

Bawda Kawn Doe Vax veng Lashio, mawh bawda pa ot greem pa op kuang mai thong bung Numli Vax Kawn Khrit Com Rawm heue. Kaing pa yuh bawda mawh kaing johjhan teem coi ka pui pa iak riang mai sonsang haok huan can pa koe daux krax pa im ju kix kuceu khawmuik heue. Bawda Vax in, hoik naog (40) num mhawm mhawm mai sonsang pon yuh kaing awm pa koe plak piang mawh kheu krax teem johjhan ceu pui kuceu, beenli kuceu mai can pui pa sibieh rhawm ti tan khankix heue. 2016 num kawn nyawm bawda khawmuik koe (55) kaux mai num gau pingnya 2015-2016 num, kawn nyawm (3) kaux laig pawk (10) tan, mai pon ti awng (2) kaux heue.



Nyi Pao Lu

Nyiexbang Ngailai Vax, Ceucao Vax W.B.C Veng Lashio

Kheu krax pa jhi Siyiex daux krax, pa mawh cubcaw ngailai vax, ceucao vax kawn khrit com rawm (W.B.C),

Veng Lashio hoik pon jah ti sum Nyiexbang Ngailai Vax daux 2016 num in heue. Glang ka singaix pa hoik luan kawx, mawh kheu ang dahdee gau ngailai ex koe kriemkriem krekre, ex tom yaox ti gau yam rung tivud ngie heue. Phan mawh yam rung, ang mawh bawgyam pa grumnaog sonsang haok huan son ngailai vax tete heue. Mawh kheu nan, ang lai joeng mawh sonsang pon gau ex ngailai vax yam rung ngie, mawh sonsang pon gau ex sijheeng, ang lai mawh son pui ceucao ex nong, hoik mawh son ceu pui vax ex pa ot daux veng Lashio kukaux heue. Ting buanson ka pui pa thongbung, pui pa tawx krax keud, pui pa tan kraungkhrari, mau khri kukaux heue. Sonsang pon sum ka Nyiexbang Ngailai Vax in, hoik siglaing paing sijhaw doh keud rawg buan son ex mai tawx krax teem ka ex liak.



Sara Sam Nap Seng



KAING RIEANG SUSAI

1. Daux ceu pui mawx ang ah, beenli mawx ang ah, sonsang rieb pa mawh kawn doe rug mai priex khrawm kia ngien kix mai tok taix yaog caong kix daux krax pa nhim.
2. Sonsang pon plih kawn nyawm mhawm, pa moh ceu pui tix mai pa grum mhawm krax cheung mai laohlie.
3. Sonsang pon plih kawn nyawm mhawm pakpeung mumhaing mai koe krax haok huan mhawm rhawm kua rhawm.
4. Sonsang lih kix ti mawh kawn nyawm moh ceu pui tix, mai sonsang lih kix ti mawh cao kaing grum mhawm heue.

Cubcaw simex

Viang koe yuh ka mawx kawx, buanson Keeing Siyiex hoik kub son cubcaw simex Numli Vax Kawn Khrit Com Rawm, daux krax pa iak riang kuceu, 2016 num khix phwan (12-15) ngaix, cubcaw simex Numli Vax pon ti hu viex daux pawie robrom ting cubcaw simex MBC bawg (4), (18) kaux, daux veng Yangon, mai pon ti viex daux kaing krub mai kaing robrom kah kum mai kaing krax klieh son pawie an mhawm mhawm heue. 2016 num khix kao (27-29) ngaix, pon khrawm simex daux baux veng khankix (9) kaux, hu daux krax gau "paoh ngai grawng akhuang pa shiang mai kawn pui" (လူ့အခွင့်အရေးဆိုင်ရာ အမြင်ဖွင့်သင်တန်း) daux veng Musie heue. Daux 2017 num cubcaw simex bak ti sang yuh krax gau pa tawx MBC mai krax gau pa lo son simex Vax mai kaing pa rom ti yuh tau mai cubcaw simex MBC heue.



Yam hu daux pawie robrom cubcaw simex MBC (Veng Yangkong)

Yam hu daux krax gau paoh ngai grawng akhuang pa shiang mai kawn pui (Veng Musie)

Sara Danyelax

Ceu Pui , Lox Sikah mai Ngailai

Lox Jah

Ka piang haktiex in koe ceu pui tomnie heue. Awm an, lox sikah kawx koe tomnie heue. Phan ceu pui tix ceu grai, grai khu ang lai ah, ang lai shiao ka lox lai tix heue. Bauxyam dix ka daux meung Man, ex hoik tawng koe lox, koe lai mai koe ceu pui Pyu heue. Viang mawh nan, yam in, ex tawng ngie hoik koe ceu pui Pyu kix, ex ang lai yaox mai mhong lox sikah kix mai lai kix heue. In mawh grawng lox tiag son ceu pui Vax. Phan ex ang priex mai hawt ah hawt gau ti tawng ka lox lai tix, baox tinga, tingoe num sax, lhat ex kox awm ceu pui Pyu kix sax heue.

Ceu Pui Vax

Phan mawh grawng ceu pui ex Vax, ex hoik dawg laig ti ot daux Meung Man in tom BC 600 num didix heue. Ex mawh cub Mon-Khama pa ah lox Awsitro-Esiasitik heue. Cub ex pa mawh Mon-Khama kaoh khaing plak blaong tom laig ti ot tau daux Meung Man in heue. Kadaux Cub Mon-Khama, ceu pui tom koe 4 ceu daux Meung Man, ceu pui an kix mawh, Mon, Palawng, Vax mai Yin Niet kix heue. Phan mawh ka piang haktiex in, ceu pui Vax tom koe daux Meung Hawx, Meung Man, Meung Thai mai Meung Law heue. Awm carang daux 2012 num, ceu pui Vax khawmuik, tom koe 11 shien haoh heue. Mawh khu nan, ceu pui Vax dawg mawh ceu pui tom bahma larawm dix heue. Ex caw ti ang lai iak jhak ka mawh ti ceu pui Vax, caw ti moh mai priex khrawm ka ceu pui tix awm pa chix tix heue.

Lox Sikah

Ka piang haktiex in, phan hoik lih ti mawh ceu pui tix ceu, lox sikah ceu pui an kawx koe heue. Mawh khu koe ceu pui Vax ka piang haktiex in, lox sikah ceu pui Vax kawx koe heue. Viang mawh kawx nan, ceu pui Vax tiblax, ang rhawm ti ah lox tix, awm kaig ah ka lox tix heue. Ceu in kix hoik mawh krax laux rhawm son ceu pui Vax tete heue. Ceu pui mawx angah, caw ti moh ti ah ka lox tix mai son ang lox sikah grai, koe beeh glawm piang ceu pui an heue. Sonsang ang ceu pui Vax grai ti ngaix sax, pa mawh ceu pui Vax kukaux caw ti ah ka lox tix, mai caw ti sitioe gau kawn nyawm iak kix ah ka lox tix heue. Inkix, mawh son ang ceu pui Vax grai ti ngaix sax heue.

Ngailai

Khaix hoik lih mawh ceu pui tix ceu kienie, ngailai kawx caw ti koe dom mawx dom an heue. Phan mawh ceu pui Vax, lox sikah kawx kawn koe, ngailai kawx hoik koe heue. Ngailai Vax hoik dawg koe daux 1933-1938 dix heue. Viang mawh kawx nan, ceu pui Vax pa ang nyang chix phat, chix tiem ka ngailai tix kawn koe tom nie heue. Ka daux ceu pui Vax, pui pa hoik chix ka ngailai Vax kawn koe 7.8 ding siyieh nyum diag (7.8 ခာဒိုင်နန်း) heue. Mawh khu nan, kawn caw ti gau mai shiao ka ngailai Vax tomnie heue. Inkix mawh krax tiex son ceu pui Vax kukaux, sonsang chix tawng ti gau mai shiao ka ngailai tix heue.

Mawh khu nan, ceu pui Vax kukaux caw ti moh ka ceu pui tix, ah ka lox sikah tix, gau sawn mai shiao ka ngailai tix heue.

Klang Krih

Cubcaw Ngailai mai Kaing Siteo Numli Vax



Pa mawh cubcaw ngailai mai kaing sitioe Numli Vax Kawn Khrit Com Rawm hoik pon ti yuh kaing jhaw Siyiex son ngailai kawn khrit mai son ngailai ceu pui Vax awm ka daux bawgyam pa tawx Siyiex ka ex heue. Ka daux 2016 num, khix pon, 18-28 ngaix ex hoik pon ti ciied ka lai gau "Gihawk Pheuk Gau Lai Vax" ka daux lum LDC veng Lashio heue. Awm beeh glawm pa hoik tawx Numli ka cubcaw ngailai mai kaing sitioe pui pa viex daux kaing ciied phuk lai gau an, mawh Sara Nyi Pao Lu, Saramax I Brah Kap, Sara Ai Sang Awng, Saramax Yex Ka Lin, Sara Sai Rong mai Sara Sam Lao Pao heue. Lheu khaing an, ex kawx hoik pon ti plih ka phuk lai gau 1,2,3 daux num pa hoik luan heue. Phan pui mawx angah, simie ti shiao ka phuk lai gau khankix pa hoik plih ex cubcaw ngailai Numli Vax, sitioe mai ex heue. Phan yuh nan, ex kawx chix sipaox hu kah heue. Yam in, lai been kraik quad, lox kab quad mai lox kab kai kix kawx ex kawn coca ti priex khrawm sonsang lih mawh phuk lai son ceu pui Vax heue. Daux 2017 num in sax, ex sang ah ti plih ka Lai Rhax Tieb Cag Miex Ngai Lai (DVD), pa shiang mai grawng ngailai Vax heue.

Nyi Pao Lu

အတိုအိတ်ဖိနပ်ကလေး...စသည်...စသည်...များကိုတံဆိပ်ရိုက်နိုင်ပါသည်

၆၀% ဝမ်းတံဆိပ်ရိုက်လုပ်ငန်း

၀၉-၇၅၅၅၈၄၀၈ ၀၉-၂၅၂၂၆၇၇၆ ၀၉-၂၅၂၂၂၈၀၈၇

TAI WA

၀၉-၇၅၅၅၈၄၀၈

Krax Kum Kawng Grawng Kaing Satsana Numli Vax Kawn Khrit Com Rawm



Ka daux khix (8), 17 ngaix tom hoek 19 ngaix, Numli Vax Kawn Khrit Com Rawm tom pon ti yuh "Krax Kum Kawng Grawng Kaing Satsana Numli Vax Kawn Khrit Com Rawm" ka daux ceucao Peng Sai, cubcaw ceucao vax kawn khrit com rawm baux veng Cing Tung heue. Ka daux krax kum kawng an, baux veng pon baux veng, guang satsana Meung Vax plak blaong mai ceucao pa koe kadaux guang satsana baux veng Cing Tung khawmuik hoik pon hoek ti kah kum son grawng satsana Numli Vax heue.



Yam goih ti kah kum (4) cub



Nyi Pao Lu

Nyiex Sidauh Omiga



Nyiex Sidauh Omiga mawh nyiex sidauh pa paoh Numli Vax Kawn Khrit Com Rawm heue. Pui mawh angah, chix ti hoek pai ka jhawm saux ti daux nyiex sidauh heue. Phan mawh jhawm saux pa ang hiex kin khankix chix ti pai, phan mawh jhawm saux kin, jhawm saux pa kaw ti ciied mai jhawm saux pa kaw ti pih khankix chix ti hoek kum kawng mai saramax pa koe beeh glawm daux nyiex sidauh heue. Nyiex Sidauh Omiga sang jhi daux krax blawng son pon pai mai pon haok daux nyiex sidauh ting heue. Phan mawh Nyiex Sidauh Omiga mawh nyiex sidauh pa cung khu buanson Siyiex, mawh khu nan, phan koe rhawm sibieh ti tan son Nyiex Sidauh Omiga kawx chix tix heue. Viang ang teei ngawh pai sidah kawx, phan pui mawh koe rhawm ti sau mau tan son pon liag ka sidauh kawx chix tix heue. Yam in, Cao Sidauh(ဆရာဝန်) 1 kaux, saramax priex pui saux (သူနာ-ပြုဆရာဝန်) 2 kaux mai saramax teem priex pui saux (အတူ သူနာပြု) 2 kaux tawx bawgyam tix daux Nyiex Sidauh Omiga heue.

Nyi Pao Lu

Krax Gau Cubcaw Sibun Bawg (9) Tangyan

Ka daux 2016 num, khix 4, 28-30 cubcaw sibun Numli Vax Kawn Khrit Com Rawm pon ti yuh krax gau bawg (9) daux ceucao Tangyan, baux veng Tangyan heue. Kaing ting son krax gau bawg (9) an mawh "Sibun pa haing hia ka daux kaing satsana" heue. Ka daux krax gau an, Sara Nyi Pao Lu (cao dia bung kaing kuceu Numli Vax) pon gau Lai Sigang Khri, Saramax Batdi Thu (cao giex kaing cubcaw sibun MBC) pon tawx krax gau pa shiang mai grawng "sibun pa haing hia kadaux kaing satsana" mai Daw Debora (Hopeek)kawx pon tawx krax gau grawng "kaing taix mai grawng yuh sipiak" heue. Kadaux krax gau an, cubcaw sibun pa koe daux (4) baux veng hoek haok krax gau heue.



Nyi Pao Lu

Krax Gau Cubcaw Sibun Numli Vax mai Cubcaw Sibun M.C.C

Daux khix 9, 6-8 ngaix, 2016 num pa mawh cubcaw sibun Numli Vax pon ti sitoe yuh krax gau tau mai cubcaw sibun MCC grawng "Cao Kaing Kuang Sibun" daux lum (2) Numli Vax, Lashio heue.



Nyi Pao Lu

Krax Gau Pa Dia Ti Yuh Tau

Jah tom 2015 num tom hoek 2016 num, Numli Vax mai Cawng Lai Sigang Khri Kala Paing (M.I.T) hoik pon ti dia ti yuh krax gau tau grawng "Bun mai Krax Yeena daux Nyiex" (အမျိုးသမီးနှင့် အိမ်တွင်းအကြမ်းဖက်မှု) hoik koe ra bawg heue. Pa mawh bawg (3) pa hoik yuh daux 2016 num, khix 11, 10-11 ngaix kienie, pui pa hoik pon haok krax gau bawg (1) mai bawg (2) kaw ti deeh kra mai thawkteng grawng krax gau pa hoik pon tix heue. Ka daux bawg (3) in, Rev. Sam Pao Ka, Sara Saing Lhax Maung, Tax Maung Maung E mai Yax Ok Noi kix tom deeh kra mai thawkteng grawng krax gau pa shiang mai grawng pa hoik pon gau tix heue. Saramax Daw Tan Tan E (M.I.T) tom hoek ti tawx riang rao mai cheuk cheu ka pa deeh kra mai thawkteng grawng krax gau son bawg (3) heue.



Nyi Pao Lu

Cubcaw Pa Siteo mai Ngailai Kawn Khrít Baux Veng Hopang

Mawh kheu buanson Siiyex, ex hoik pon ti yuh kaing son ngailai vax son kaing jhaw Nawh Cao heue. Ka daux 2016 num, cubcaw pa siteo mai ngailai kawn khrít baux veng Hopang hoik pon ti yuh krax gau son mawh sara ngai lai vax, pa mawh saramax Yex Ka Lin mai Sara Sam Lao Pao hoek ti tawx krax gau daux ceucau Mak Van heue. Ka daux krax gau an, sara/saramax pa rieb ti gau koe (22) kaux heue. Lheu khaing an, sonsang pon gau ka kawn nyawm iak ka ngai lai vax, cubcaw ngai lai baux veng Hopang mai kawmiti guang satsana Meung Yom kix hoik pon ti ploí sara/saramax pa gau ngai lai vax (6) kaux kadaux guang satsana Meung Yom son (7) yaong heue.



Yam gau ngailai vax daux guang satsana Meung Yom



Yam tawx krax gau son mawh sara ngailai vax daux ceucau Mak Van

Sara Lok Tao

Cubcaw Pa Siteo mai Ngailai Kawn Khrít Baux Veng Tangyan

Mawh kheu buanson Siiyex, ex pa mawh cubcaw pa siteo mai ngailai kawn khrít baux veng Tangyan hoik pon ti viex ka daux kaing jhaw Siiyex awm beeh glawm pa hoik goih ti tawx ka ex heue. Baux veng Tangyan hoik pon ti yuh krax gau son mawh sara ngailai vax, daux ceucau Tangyan ka daux 2016 num, khix 5 heue. Ka daux krax gau an, Saramax Yex Ka Lin mai Sara Sam Lao Pao hoek ti tawx krax gau mai Sara Nyi Pao Lu (cao giex kaing cubcaw ngailai mai kaing siteo Numli Vax) pon hoek ti tawx riang ka ex heue. Yamin, ka daux baux veng Tangyan, ceucau Pang Yax (yaong lah) hoik jah ti sum nyiex cawng gau ngailai vax daux ceucau ti heue. Ku khix ku num mai yam rung praix daux baux veng Tangyan pa mawh yaong Hoe Kong, Pang Yax, Pang Yax (yaong lah), Nam Phat Tan, Nam Khan, ceucau Tangyan mai yaong Sai Pun kix hoik pon ti gau ngailai vax mhawm mhawm heue. Yamin, kawn nyawm pa awn ju mai kawn iak khankix hoik chix ka ngailai vax daux baux ju pa koe tix heue.



Sara Ai Sawng

Cubcaw Pa Siteo mai Ngailai Kawn Khrít Baux Veng Cing Tung

Kheu Buanson Siiyex, ex Numli Vax jah ti pon siteo tix mai cub SIL (Summer Institute of Linguistics) tom (2004) num hoik koe 10 num haoh heue. Jah ka daux num 2005 Cub SIL hoik tawx krax gau pa shiang mai plak ngailai ka ex tomnie tom hoek in singaix heue. Ex pa mawh baux veng (4) baux veng pa ot greem Numli Vax pon ti viex kah heue. Kheu krax pa johjhan kix, ex hoik pon ti plih phuk lai gau mai lai been khankix tomnie heue. Awm hoik yaox ex ti rieb gau, ex kawx hoik pon ti so rhawm rhi pui nyiex pui yaong mai tawx krax gau ka daux nyiex daux yaong khankix son sang koe rhawm mai son sang sau riang tix gau ka miex ngailai tix heue.

Simie ti kiek ex tawng grawng kaing pa yuh ka daux baux veng Cing Tung ceeix. Sonsang chix moh ka ngailai tix, sonsang gau ka ngailai tix mai sonsang chix shiao ka ngai lai tix haok huan ting lhaong, ex hoik pon lai ling ti so rhawm rhi ceu cao/nyiex yaong pa ot greem baux veng Cing Tung mai ka daux haktiex guang Satsana khankix heue. Ex hoik pon tawx krax gau tomnie pa shiang mai ngailai. Krax gau son mawh cao gau (Teaching's Training Workshop), Krax gau son mawh cao tiem lai (Writer Workshop), krax gau sonsang dex dawd mai Gumlox Siiyex (Scripture Use Workshop), krax gau pa paoh jhi yaox (Advocacy Training). Phan mawh ka daux num 2016 ex hoik pon yuh krax gau ka daux ceu cao Jo Phiu, daux guang Satsana pa mawh Meung Ka mai ka daux vang Wan Hong heue. Sonsang haok huan ngailai ex awm mawh beeh glawm ex pui ceu Vax khawm uik, yam plih lai lih, simie ex jhi krax moh tix tee ti phat ka lai pa yuh ex mai tawx krax teem ka daux kaing pa yuh ex heue.



Yam Yuh Krax Gau Daux Meung Ka



Yam Yuh Krax Gau Daux Ceu Cao Jo Phiu, Cing Tung



Yam Yuh Krax Gau Daux Vang Wan Hong

Saramax Yex Ka Lin

Cubcaw Pa Siteo mai Ngailai Kawn Khrít Baux Veng Lashio

Mawh kheu buanson Siiyex, cubcaw pa siteo mai ngai lai kawn khrít baux veng Lashio, jah 2012 num tom hoek ka 2015 num, ex hoik pon yuh krax gau "Son Mawh Sara Ngailai Vax" (4) bawg phao heue. Ka daux 2016 num kawx, kheu grawng kaing pa loh cub SIL kix ti yuh son baux veng Hopang kienie, ex tom laux daux num in heue. Ka daux 2017 num kawx, ex tak sang yuh singaix 22-29/1/2017 ka daux ceucau vax Man Pien heue.

Kheu mawh ngailai pa ting ceu son beenli mai ceu pui ex kienie, kaing pa shiang mai ngailai kawx ex ang doh kiek dieh yawm hu heue. Mawh pa caw ti haokhuan tinglhaong ti glawk hoik ti glawk tete telai heue. Mawh kheu nan, kaing pa shiang mai ngailai koe tomnie, sonsang pon yuh ex lih mawh tu tix baux hoik tix baux, yuh buanson rom ti rawg buan son ex kukaux daux pui liak

Sr. Sam Nap Seng

Cao Giex Yang

Cubcaw Pa Siteo mai Ngailai Kawn Khrít
Baux Veng Lashio

Kaing Dia Cubcaw Khankix Ti Yuh Tau

2016 num khix (6), (4) ngaix, cubcaw kawm nyawm mai cubcaw krax haok huan Numli Vax Kawm Khrit Com Rawm rom ti yuh "Singaix Priex Rien Rawb Rim Beuhaktiex" (ကမ္ဘာ့ဝတ်ဝန်းကျင်ထိန်းသိမ်းရေးနေ့) ka daux sipeem Ju Pa Riieng pa priex rien kawm nyawm (Numli Vax) heue. Daux singaix an, cubcaw kawm nyawm mai cubcaw krax haok huan pon ti sum ka plix khaox plix ox mai pon ti tawx krax gau "Grawng Chix Tawng Ti Priex Rien Ka Rawb Rim" (ဝတ်ဝန်းကျင်ထိန်းသိမ်းတတ်ခြင်း) mai "Grawng Sigit Rawm Singax" (ကျောက်ရေစစ်ခြင်း) khaing pa mawh Sara Tang Khaing (Taong Ci) heue.



Yam yuh krax sum khaox, krax gau, mai kaing ciied rawm singax Tai Pruh

Grawng Nyiex Bang Ju Pa Riieng Pa Priex Rien Kawm Nyawm

Mawh kheu buanson Siyiex, cubcaw kawm nyawm Numli Vax pon ti paoh ka "Nyiex Bang Ju Pa Riieng Pa Priex Rien Kawm Nyawm" daux 2016 num khix Liah heue. Phan mawh grawng Nyiex Bang Ju Pa Riieng kienie, mawh sonsang pon rieb ti cox khre, gau sawn ka pui pa lud ih, lud nyaux ka daux ceu pa yoek pa awp heue. Sonsang ang kawm nyawm khankix lai pon ti hu kadaux krax pa somnai mai sonsang pon kix ti dex dawd mai Siyiex, daux krax im ju kix son ang lai mawh pa faik, mai son deeh mawh pa riieng daux Cao Khrit pa mawh cubcaw kawm nyawm tom een ka krax bak keud pa mhawm mai paoh ka Nyiex Bang Ju Pa Riieng in heue. Yam ot kawm nyawm pa lud ih lud nyaux daux Nyiex Bang Ju Pa Riieng, ex kawx pon ti kok ka Sara/saramax khankix hoek ti gau kix ka Gumlox Siyiex ku ngaix heue. Phan ex yaox pui pa simie ti sang tieh loh ka krax im ju tix, siteo mai tawx hoek ka cub kawmiti Nyiex Bang Ju Pa Riieng awx. Phan mawh ngawh krax ih krax nyaux kienie, mawh tix kaux pui tix khix 30,000 plah heue.



Yam tawx Sara kix riang rao Yam gau ka Gumlox Siyiex Klang Krih

Krax Yuh Paoxpie

Bawgyam hoek kawm simex Tax Sara Ting Aong Din, pa mawh Sara Saw Saw Din ti teei Ara Deuh Taix daux Numli Shiem plak blaong (Shan Myaok), ex pa mawh pa yuh kaing daux Numli Vax pon ti yuh paoxpie mai kawm nyiex kawm ma kix heue. Daux 2016 num, khix kao tix, 24 ngaix, Sara Saw Saw Din tom teei Ara Deuh Taix daux Numli Shiem plak blaong (Shan Myaok) heue. Yam tawx Ara Deuh Taix kawx, Numli Vax Kawm Khrit Com Rawm pon ti jhi krax moh ka nawh mai Rev. Ai Nap Tao (cao bung kaing kuceu) Numli Vax tom krai lox Yaogmin mai lox ting buanson ka Sara Saw Saw Din tang Numli Vax heue.



Klang Krih

Grawng Plaik Lox Lai Sigang Khri Pa Khraox Daux Cag (Audio Bible Recording)

Kadaux 2015 num, jah khix 6, 18 ngaix tom hoek khix 7, 28 ngaix, ex pa mawh Numli Vax hoik pon ti plaik "Lox Lai Sigang Khri Pa Khraox" daux cag heue. Phan mawh son kaing in, pa mawh cub Lai Sigang Khri Meung Man mai cub SIL kix tom siteo ex Numli Vax yuh mai cub FCBH "Faith Comes By Hearing" (Krax Yumrhawm Kaoh Khaing Krax Mhong) heue. Numli Vax tom hoik pon ti shiao ka pui son kaing an, (26) kaux heue. Yam in, kaing an, hoik pon ti hoik mhawm mhawm mai hoik sau daux cag bhaung heue. Sonsang pon ti shiao ka cag bhaung an, cub SIL kawx hoik kok ti tawx krax gau son pui pa sang thong bung ti shiao ka cag bhaung daux meung Thai, veng Miesai haok khix 10, 10-14 ngaix heue. Ka daux krax gau an, Sara Petrux, Sara Nyi Meung, Sara Ai Sang Awng mai Saramax Yex Ka Lin kix hoik pon ti haok krax gau son (4) baux veng heue. Cub HCBH tom tawx cag bhaung (118) mu son Numli Vax heue. Numli Vax kawx hoik pon ti goih ti tawx hu ka (4) baux veng heue.

Khaix hoik deeh hoek kix cao hu haok krax gau sonsang pon shiao ka cag bhaung daux veng Miesai, pa mawh Sara Nyi Pao Lu (Cao Dia Bung Kaing Kuceu Numli Vax) mai Sara Petrux tom deeh hu siteo ti tawx krax gau ka baux veng Tangyan daux khix 11, 2 ngaix heue.



Nvi Pao Lu

Cubcaw Cao Sidiex

2016 num, khix Kao (18-21) ngaix, Cubcaw Cao Sidiex Numli Vax pon yuh krax gau son cao sidiex khankix pa koe daux Numli heue. Ka daux krax gau an, Rev. Brang Nu gau grawng "Kaing Jhaw Sara Ceucao," Rev. Ngox Khun Pen gau grawng "Been Giex Kuang mai Krax Yum Rhawm Kawm Khrit," Rev. Ai Nap Tao gau grawng "Kaing Satsana Vax Son Sivoe Ngai" heue. Ka daux krax gau an, cao sidiex pa koe daux Numli Vax hoek (63) kaux heue.



TM

Cubcaw Kawn Nyawm Numli Vax

Bang Kaing Kawn Nyawm (Youth Work Camp)

Ka daux 2016 num, khix (3), 15-19 ngaix, *Cubcaw Kawn Nyawm Numli Ting Meung Man* mai *Cubcaw Kawn Nyawm Numli Vax* khraix khrawm ka kawn nyawm pa koe daux Numli (18) mu mai ceucao (2) mu (Emanoelax mai Yuxdaxtan) yuh kaing kawn nyawm (youth work camp) daux Numli Vax heue. Mawh kheu sang ah cubcaw kawn nyawm Numli Vax ti sang paoh ka "Ju Pa Riieng Nyiex Bang Pa Priex Rien Kawn Nyawm," cubcaw kawn Numli Vax tom kieh kawn nyawm pa hoek khaing ku Numli yuh kaing daux sipeem Nyiex Bang Ju Pa Riieng heue. Ka daux "Bang Kaing Kawn Nyawm" an, pa mawh kawn nyawm Numli Vax, Numli Shoeli Shiem, Numli Shiem plak blaong (Shan Myaok), Numli Yang (Skaw) mai Ceucao Emanoelax khawmuik 112 kaux pon yuh kaing son "Bang Kaing Kawn Nyawm" (Youth Work Camp) heue. Pa thong bung son "Bang Kaing Kawn Nyawm" an, mawh Sara Wuing Thux Ta Ci (Cao giex kaing kawn nyawm MBC) mai Sara Ngox Awng (Cao giex kaing kawn nyawm Numli Vax) heue.



Pawie Robrom Kawn Nyawm MBC Bawg (8)

Kadaux 2016 num, khix (5), 3-7 ngaix, *Numli Ting Meung Man Cubcaw Kawn Nyawm* tom yuh pawie robrom kawn nyawm bawg (8) daux Yangkong heue. Ka daux pawie robrom an, *Cubcaw Kawn Nyawm Numli Vax* tom pon hu 132 kaux heue.



Krax Yuh Kawn Khrit Com Rawm Meung Man Paoxpie Son Ku Meung Haktiex (International Myanmar Baptist Fellowship)

Ka daux 2014 num, khix (11), 20-25 ngaix kawx, cubcaw kawn nyawm Numli Ting MBC tom pon khraix khrawm ka kawn nyawm pa koe daux Numli Meung Man ku Numli mai kawn khrit com rawm Meung Man pa ot Meung tang dah khankix khrawm paox tix daux Meung Thai, Veng Bangkaok heue. Ka daux krax yuh paoxpie an, son Numli Vax, cubcaw kawn nyawm Numli Vax hoik pon ti hu (9) kaux heue.



Sara Ngox Awng

Cawng Gau Pingnya Numli Vax

Cawng gau pingnya Numli Vax mawh kaing pa khraox jah ti yuh ka daux 2014 Num heue. In mawh nyiex cawng pa paoh ex Numli Vax son kawn nyawm cawng pa sang ot ka daux been kawn khrit heue. Viang ceu pui tang ceu tomnie hoik yuh cawng satsana kawx, ex kawn vax ang nyang yaox ti yuh cawng satsana awm pui. Mawh kheu nan, ka daux bang kum Numli Vax kawn khrit comrawm pa yuh ka daux ceucao Hopang daux 2012, ex grum rhawm ti sang yuh cawng satsana son ex kawn vax heue.

Cawng in kawx, mawh cawng pa sitoe mai cubcaw pingnya Meung Man (ပညာရေးဝန်ကြီးဌာန), son sang chix cung piang caong tix. Hu sivoie sax, kawn nyawm cawng pa ot daux cawng gau pingnya Numli Vax, ang lo ti hu cawng plak praix heue. Sonsang pon ex akhuang yuh nan, ex caw ti sum nyiex cawng phao voe heue. Kheu Buanson Siyiex, ex kawn dha tix koe kuang nyiex cawng pa tan Nyiexma Sara Tax Saing Lhax Maung mai Saramax Yax Rosi heue. Yam pon ex akhuang khaing cubcaw pingnya Meung Man (ပညာရေးဝန်ကြီးဌာန) yuh nan, ex sang jah ka glhawk jah heue. Yamin, mawh kheu krax nu krax cien, ex ang nyang pon rieb kawn nyawm cawng tomnie heue. Num in ex rieb ka kawn nyawm cawng glhawk (9) mai (10) khaing heue.o



Yam Hoek Cubcaw Pa Thong Pa Bung Numli Vax




Kawn Nyawm Cawng Daux Num Gau Lai (2016-17)



Yam Tawx Krax Gau Son Sara, Saramax Khankix



Yam Tawx Krax Gau bawg (2)



Nyiex Cawng Pa Koe Daux Rieang Susai

Cao Gau

Cubcaw Lox Buan Gaux Rhawm Mai Kaing Satsana, Baux Veng Lashio

Ka daux baux veng lashio, koe ceucao (17) mu mai guang satsana (3) dah heue. Guang satsana kienie, koe daux veng Kong Heng pa mawh yaong Nam Maw Kham mai Nam Maw Tawng, daux baux veng Tangyan pa mawh yaong Nam Pha Tang mai Nam Paw Phat heue. Ka daux 2016 num, Khix (12) 16 - 21 ngaix ex *Cubcaw Lox Buan Gaux Rhawm mai Kaing Satsana* baux veng lashio lailing ti tawx riang rao ka ceucao khankix heue. Cao giex kaing cubcaw cao sidiex baux veng Lashio pa mawh Rev. Sai Ao Pien, cao priex sin buan baux veng Lashio pa mawh sara Sai Nap Tao, cao giex kaing cubcaw krax haok huan pa mawh sara Petarux, cao giex kaing cubcaw lox buan gaux rhawm mai kaing satsana pa mawh sara Ai Awng, Sara Ai Thun, kawn nyawm ceucao Peng Sa, Man Pien, Man Kawng kix tom lailing ti yuh *Krax So Kaoh Vaoh Haing Pawie Khrimat* ka ceucao khankix heue. Ka daux kaing an, pui pa hoek cobcom rawm simex koe (17) kaux, sibun (27) kaux, khumuik mawh (44) kaux heue.



Pui Pa Com Rawm daux Nam Maw Kham



Nam Pha Tan



Kaoh Khaing Meung Su, Laig Tang Yan



Daux Meung Kaong Sara Ai Awng

Cubcaw Pingnya Been Buan

Ka daux 2016 num, khix (4), (24-30) ngaix, cao giex kaing cubcaw pingnya been buan Numli Vax, pa mawh saramax I Lai pon tix hu tawx krax gau pa thong bung daux baux veng Hopang son krax gau yam rung heue. Kaing ting krax gau an mawh "*Haing Hia mai Viex Daux Ceucao* (တက်ကြွပါဝင် အသင်းတော်တွင်)" heue. saramax Mai Tin Lhaing (MBC) hoek ti tawx krax gau mai tawx riang ka ex heue. Saramax (10) kaux mai kawn nyawm iak (89) kaux pon ti teei krax gau an heue. 2016 num, khix (8), (23-26) ngaix cao giex kaing cubcaw pingnya been buan Numli Vax, pa mawh saramax I Lai pon ti hu tawx krax gau pa thong bung daux baux veng Cing Tung son sara/saramax pa gau Cawng Singaix Twah heue. Mawh kheu buanson Siyiex, cubcaw pingnya been buan Numli Vax Kawn Khrit Com Rawm pon ti yuh kaing jhaw Siyiex mhawm mhawm heue. Ka daux Numli Vax, son-sang haok huan kaux riah kawn nyawm awn ju, kawn nyawm rieh ju mai pui ting ju (kuad) kadaux ju khuan pa mawh baux veng, ceucao khankix caw ti gau pingnya been buan kriem kriem kre kre heue. Saramax ting En Ju Li (MBC) hoek ti tawx krax gau mai kum kawng son pingnya been buan Numli Vax daux 2016 num, khix (10), (3-5) ngaix daux lum(2) Numli Vax heue. Pui pa hoek daux krax kum mai krax gau an, koe (31) kaux heue



Tawx Lox Buan Gaux Rhawm

Mawh kheu akhuang mai bawgyam pa cox khre Siyiex ka son ex, viang ex ang keud sawn daux rhawm tix kawx, Siyiex paoh daux krax son hu tawx lox buan gaux rhawm heue. Daux 2016 num, jah daux khix ra tom hoek daux khix (12), Siyiex yuh kaing pa ting ka daux ceu pui Vax kheu lox buan awm plak greem in heue. Yam tawx Siyiex akhuang ti kieh ex hu daux haktiex Vax son gum lox buan, cao giex kaing dah mawx dee an, tawx akhuang sonsang pon lailing ex, mai pon tawx krax gau "Grawng Krax Taoh" ka daux ceucao Pang Sang (4) ngaix, Panyang, Pang Ho Koi (3) ngaix, veng Meung Mhau ceucao Kaing Lah (20) ngaix, cawng gau lai Na Yao (2) ngaix, Meung Phien (1) ngaix, daux Khun Law (2) bo, Panyang Pang Pheung (2) ngaix, daux Kawn Mau (2) ngaix, daux Pang Sak (5) ngaix, daux Hopeuk Kong Nyox (2) ngaix, khawmuik (11) dah heue. Khaix an, pon ti hu tawx lox buan daux haktiex Vax plak seh mai plak laong dee tiblah, mai pui rieb cobcom rawm khawmuik koe (597) kaux heue. Yam lailing tawx lox buan an, yaox ti teei beeh glawm daux kaing Ap Cawng Nyiex Buan Khraox (4) mu, pa mawh cawng nyiex buan Meung Cawd Pax Tong Yao, Meung Phien Sawng Kie, Meung Pawg ceucao Keud Pot mai Ying Phang ceucao Kawn Mau heue. Inix, mawh pa yuh Siyiex ka son ex heue. Ang koe pa yaw rangdi tokaux tix, mawh pa krai grawng buanson mai mhai pa daox am pa yuh Siyiex son ceu pui Vax heue.



Sara Ting Ngox Khun Pen

Dandee Sipub Kawn Nyawm Vax Ex Paox Tix
သွေးချင်းသားများ ဆုံညှင်းရာ
မိုင်းမောမြေ (ပညာအိမ်)
(၉)တန်း၊ (၁၀)တန်း (၇)နှစ်သက်တိုက်
အောင်ချက် ၇၅%
Maing Maw Myay
 ထာဝရဘုရားကိုကြောက်ရွံ့သောသဘောသည် ပညာ၏အချစ်အခြာဖြစ်၏။
 (သုတ္တံ - ၁:၇)
 No.31, Maing Maw Street. Ph. 09-266421354, 09-47301858, 09-401625343